



Martinus in Sueuia natus & educatus fuit. Is post prima literarum rudimenta feliciter iacta sese hinc inde ad academias Germaniæ contulit, & bonas artes egregiè didicit. Inde ad Theologiam conuersus, in ea facultate adeò profecit, ut Heidelbergæ S. Theologiæ Licentiatus constitueretur, atq; sacras literas ibi publicè profiteretur. Erat insuper religioni deditissimus, & magna facundia præditus. Id cum Ulmenis respubl. intellexisset, statim post Ecclesiæ suæ reformationem hunc Martinum ad se uocarunt, & suæ urbis primarium Ecclesiasten elegerunt. Eam functionem is magna laude diu administrauit, & omnibus gratissimus

fuit. Cum autem in Cœnæ negotio contentio quædam inter Euangelicos esset, ipse cum Bucero et Musculo in Saxoniam ad Lutherum profecti 1536, eius sententiæ ferè subscripserunt. Postea Frechtius 1546 in colloquio Ratisbonæ fuit, & cum aduersarijs pro sua eruditione disputauit. Cum autem Cæsar bello Smalkaldico uictor esset, & Augustæ Vindelicorum religionis causa comitia celebraret, Magistratus Ulmenis (Granuellani rogatu) petierat à Frechtio, ut Augustam profectus, negotium religionis adiuuaret, & ad Pflugium, aut Sidonium, aut Islebiu diuerteret. Ille quod & suspectam rem haberet, & quod è reliquis ciuitatibus nemo sui ordinis adesset, recusauit.